

NAUPANG SUNDAY SCHOOL TEACHERS' TRAINING

Khuga Sadar Presbyery

On 10th January 2018.

At Head Quarter Church, Tuibong

Sunday School hi kum zabi 19 hunlai ah naupang lekhasim theilo leh ziktheilote a dinga Khristian School hung kiphudawk chu ahi. Zia hunlai ahin naupang genthei tak tak mai, lekha sim saklo ah umte, kalkhat ah ni 6 sung nasem ah pang, a dinmun ua lekhasim hun ding neilote ngaituana ziaka hung kipan ahi.

Zia Sunday School hi tulai kochuiamte'n hung juitou pek in kochuamtin in Sunday School i neichiat tau ahi. Kum zabi 19 hunlai in lekhasim theilote leh ziktheilote tiang ala buai piu himaleh, tulai ahin kochuamte I vangphau a, Bible thubep hil leh zilsak thei in i umtau ahi. Sunday School teacher khat in a sepding chu naupangte chu Bible thu hawitaka hilding, pauchapdan leh Pathian thu tawh kituaka ah hinding dan hil ah puihuai chu ahimai hi. Zia chu Sunday School Teacherte'n I mawpuaknau lianpen chu ahi. Zia chu ahijiakin Sunday School Teacherte chun naupangte chu hawitaka lamdika a chiatheina ding uh chu hil thei ngei dinga kisakzaw ding ahi. Zia dinga chun Sunday School Teacher khat in a bawl ding leh a hitei dinga pawimaw khenkhatte vak ngaitua khawm hitiu.

1. Teacher guat thu ah:

Presbyterian kochuam hi gospel Camp, ahilol hileh piting nunga piangthakna hawl i hi puau a, Pathian mi ah kikawite chu ihu ahi. Pathian mite ah chu umte ihijiak un naupangte chu chanchinpha tawh kituaka a hung seilet jel ding uh chu teacherte mawpuakna khat chu ahi. Zia chu ahijiakin Sunday School teacher ding guat thu ahin chitthei angai khawp mai hi. Zia thu ahin Local committee in Teacher ding hi ngaisak piak deu chu a ngai hi. Kochuam khenkhat ah chun a mi ding um mamalo ti bang le chu a um thei hi. Zia hin a etsak chu kochuamte i thagau lam dinmun uh a kichian khopmai hi. Midangte thagau lam ah ouihwaitu ding neilo ihu chu a kilang hi. taksa ah piting, thagau lama pitinglo ihijiak uh ahi. Teacher ding guat hun tak le midangte/naupangte thagau lam a siam piting thei ding mi chu guat tei ding ahi.

2. Piangthak mi ahiding ahi.

Mi piangthak ti umzia hin Pathian hemi, lau leh ama hinkhua ah Pathian nei tina ahi. Sunday School Teacher khat chu naupangte Pathian thu ah puihwaitu ahin Pathian he ah piangthak hinkhua amat ding ahi. Tulai Sunday School Teacher tamzawte hi khanglaite a kihideu in, kochuamte'n le mat phachuam tak in a nei ui. Ahinla, tulai Sunday School teacher khenkhatte chu zu leh sa haisan diaklo ah Sunday School teacher ah pangjing a ki-um hi. Niguk sunga chun nitak sin ah ju va dawn jing sek, Pathianni a hungtung phat le Sunday School teacher na chu va sem jel aki-um hi. Zu dawnte bep chu piangthaklo ahidiak puau ah, a dawnlote le piangthaklo a ki-um, tho hi. I gennawp tak chu piangthaklo ah Sunday School teacher ah pang a ki-um hi. Zia gual mite chun naupangte chu banggual in Pathian thu in i hung puihuai tou diam tichu ngaitua umtak ahi. Naupangte chu Pathian thu ah puihuai ding chu teacherte mawpuakna ahin, zia dinga chun teacherte chun le Pathian anei ding uh chu thil pawimaw tak ahi.

3. Ngaisakna nei ding ahi.

Mihingte'n I pawimaw mamau chu kingaisakna hi ahi. Teacher khat in a studentte a ngaisak chu thil pawimaw tak ahi. Zia dinga chun naupangte a dinga hun tam a piak ding ahi. Ngaisakna tawh naupangte hun tampiakna chun naupangte dawidan hetna ahin, zia chun naupangte a pawimaw uh chu teacher khat chun a sepdaw piak kha thei sek hi. Zia chun naupangte lungthim a het thei in, zia apat chun a puihuai thei ngal ahi. Teacher khat chun naupangte lungthim chu het tei ding ahi.

4. Kipiakzawna a nei ding ahi.

Kochuam khat in Sunday School Teacher dinga ei guat khak uh hi thil kipak umtak mai ahi. Ziaziakachun, Sunday School Teacher kinep um leh mantam higuat ding ahi. Sunday School Teacher I hikhakna hi a awng huktu mai I hipuai ti I kihet a ngai hi. Tulai teacher khenkhatte chun a studentte le ngaisakna nei beklo in a nop le present va bawl mai mai bang a kitam sek ahi. Zia chu hilo ding in teacher khat chun kipiak zawna tak nei ah naupangte chu a etkawlding ahi. Naupangte Sunday School kaidinga a mun tungjo tau a teacher ding nu/pa hungnailo tihaw hi bawlo kei ding ahi. Mun khenkhat ah chun ziagual hi a um nuam sek mamai.

5. Nang kizil masa'n.

Naupangte hil masanga teacher khat kizil masak ding hi tulai teacher khenkhatte I lawsapnau chu ahi. "Lesson la va hilding kha nangin sim masa'n la va hil in" Teacher khenkhatte chun class room ah va sim kawm, va sim jiang mai chu le thiam kitlo a ki-um sek hi." Nang inle la va sim thiam beklo chu la naupangte chu bangti'n a het ding uh a diam? Ngaitua hawi a ngai hi. Ahithe chan ah teacherte'n lekhabu valak a va sim mai lo a, i zillai ding chu hetsa ah kuan zawk ding ahi.

6. Naupangte kum dungjui ah Class khen ding:

Khenkhat ahin Local Committeein a ngansia, Khanglaite leh Sunday School Superintendent te khut ahin Naupang Sunday School hi a piakdaw jiang uh a um hi. Zia chi ahijiakin naupangte a kum dungjui ua class khen piak ding chu pil vang angai khawpmai hi. Kochuam khenkhat in naupangte kum leh tha hetpi keilo in sawt taktak pi bang Begiiner/ Primary pou in a kawu sek ui. Tigual ah chun naupangte a hung kaw-isawtphat ua le Senior/ Sacrament class zil manlo in ji/pawsal ahung nei kha sek un, kochuam chiadan ah thununna la piak thei chetlo bang aum sek hi. Ziakachun, teacherte/ Superintendent ten naupangte kum leh tha thu in fimkhul ten a ngai hi. Naupangte chu a kum dungjui ua class khen ding ahi. Kum 14 ah dan jokim dinga laklut hiding ahiu ti chu hetjing ding ahi.

7. Naupang pawl khen dan leh Subject:

Naupang Sunday School Subject pawl tin a Bu khatna leh Nihna tiang um ahin, Kum leh Pawl khendan anuai agual hi ahi.

<u>PAWL</u>	<u>KUM</u>
1. Beginner - I	4-5
2. Beginner - II	5-6
3. Primary - I	6-7
4. Primary - II	7-8
5. Junior - I	8-9
6. Junior - II	9-10
7. Intermediate - I	10-11
8. Intermediate - II	11-12
9. Senior - I	12-13
10. Senior - II	13-14
11. Sacrament	14-15

Tu tiang ahin nu leh pa khenkhatte chun, ka naupanglai ah ka hotu pa un Bible chang ei hil kha ka hejing hi a ti sek ui. Zia thu hin a etsak chu naupangte lungthim ah thil chi khat kitu chun hunsawt takmai a lua jing hi. Tuni naupangte teacher ah la pangna hin nang in bang thu la hil daw em? Sunday School Teacher hin mawpuakna lian tak mai taksa leh thagau lam in a nei hi. Tuni nang in naupangte kianga chun Pathian thu ah chi hawitak mai la phum gu thei ahi. Ziakiachun, teacher hina hi ngainep maimailo ding ahi. Mawpuakna liantak mai nei ihi dan hi het ding ahi.